

IREVITIKO

Tasorintsi ikantakerira Moiseshi tyara inkantaigakeri iseraereegi piratsipage intagaigakenerira

1 ¹Impogini^a yogari Tasorintsi ikaemakeri Moiseshi iriniakerira ivankoku. Impo ikantiri:

²“Pinaigakerira iseraereegi pinkantai-gakerira: Antari pamaigenerira Tasorintsi pipira inti pamaiganakeneri vaka intirika ovisha.

³“Irirorika pamaiganakeneri vaka intagakenkanira inti pamaiganakeneri surari pairorira inkametitasanotake. Onti pamaiganakeri osotsimoroteku ivanko Tasorintsi pimpaigakerira saserorote intagakenerira Tasorintsi. ⁴Ikantaketari irirori tyanirika vetsikankitsine terira onkametite iramanakenerityo ipira saserorote intagakenerira Tasorintsi kameti ganiri ikisashitari. Antari iramanakenerira saserorote oketyo intagatavakeri igitoku kameti irironiri punatanankichane, ganiri iriro ikisashita Tasorintsi. ⁵Impo irovetisakeri anta tsonpogi sotsimoroku ivankoku Tasorintsi onakera itagantaganirira piratsi. Ogari iriraa iragajaigakero saseroroteegi itomiegi Aaron irisagutantaigakemparora itagantaganirira piratsi intsotenkaigakerora onampinapageku. ⁶Impo imeregakeri intotakerira irogiripegakerira. ⁷Impo yogaegiri itomiegi Aaron irogisashiigakeri

tsitsi itagantaganiriraku piratsi. ⁸Impo irogeigakero patiropage yogiripegakerira tsitsiku intentagantaigakemparora igitonti igeimankure. ⁹Ogari iramporetsa ontiri ivori inkivageigakero impo intagagetakero tsitsiku intentagakerora igitonti igeimankure, magatiro. Impo ontaganakempara irishineventakemparo Tasorintsi ineakero kametitake.

¹⁰“Antari intirika iramaigakeneri ovisha intirika kavera ario inkañotagakempari irirori inti iramakeneri surari kametitasanotankitsirira. ¹¹Impo irovetisakeri oatakara kamatikya itagantaganirira piratsi. Yogaegiri saseroroteegi itomiegi Aaron iragajaigakero iriraa irisagutantaigakemparora itagantaganirira piratsi intsotenkaigakerora onampinapageku. ¹²Impo intotakeri irogiripegakerira. Yogaegiri saseroroteegi irogeigakero yogiripegakerira tsitsiku itagantaganiriraku intentagantaigakemparora igitonti igeimankure. ¹³Ogari iramporetsa ontiri ivori inkivageigakero impo intagaigakero magatiro. Iriri intagaigakeneri Tasorintsi kameti ineakeroniri irishineventakemparora.

¹⁴“Antari irirorika iramaigakeneri aragetatsirira inti iramakeneri emori intirika shiromega. ¹⁵Impo yogari saserorote iramanakeri itagantaganiriraku piratsi intagakenerira Tasorintsi. Oketyo

a 1.1 Irevitiko *Levítico* onti onkantakera “irashiegi irevitaegi”. Oka sankevanti onti oniakotake tyara inkantaigakempa isaseroroteigakera iyashikiiganakerira Irevi, irorotari opaitantakarira Irevitiko.

intimpuakero igitu. Ogari iriraa ompintanakero onampinapageku itagantaganirira piratsi. ¹⁶Impo inoshikakero ichagine irogakerora onakera samampo oatakara ikontetira poreatsiri onampinaku itagantaganirira piratsi. ¹⁷Impogini iragagetakeri pitetiro ishivankiku inomereakerira intimpeakerira, kantankicha gara itimputuiri. Impo intagakeneri Tasorintsi. Antari intagakempara irishineventakempari Tasorintsi ineakeri kametitake.

Ikantaigakerira tyara inkantaigakero iseraereegi impaigakeririra Tasorintsi

2 ¹“Antari ontirika iramakeneri turigopane ontityo iramake pairorira oshipetyapanetasanotake irisagutakero aseite impo intiantakemparo kasankapaneri. ²Impo iramakeneri saseroroteegi itomiegi Aaron impo irirori iravivatake intagakakerora itagantaganiriraku piratsi intagakenerira Tasorintsi kameti ineakerora irishineventakemparora isuretaemparora ikantaigakeririra iseraereegi inkavintsaavageigakerira. ³Ogari aityokyarira onae inti shintakemparone Aaron intiri itomiegi, magatirodari iramakenkanirira Tasorintsi irirottyo shintakemparone.

⁴“Antari ontirika pamakeneri pan tashitankicharira oronoku ontityo pamakeneri ovetsikantunkanirira turigopane shipetyapanetasanotankitsirira gara okonogumata opoegantarira, onti onkonogantakempa aseite. Aikiro ontirika pamake pan paio oentyatasa-notake pintiritakero aseite.

⁵“Ario onkañotake aikiro irororika pamakeneri pan shionkari ontityo pamake ovetsikantunkanirira turigopane shipetyapanetasanotankitsirira gara okonogumata opoegantarira onti onkonogantakempa aseite. ⁶Impo pintimporokakero pisagutakerora aseiteku, ontitari irashi Tasorintsi.

⁷“Ario onkañotakempa aikiro ontirika pintashitankakemparo koviti onti povetsikantakemparo turigopane shipetyapanetasanotankitsirira pinkonogakero aseite.

⁸Tyatirika pamake irororika tashiri ontirika shionkari pimpakeri saserorote iramanakerora itagantaganiriraku piratsi intagakenerira Tasorintsi. ⁹Kantankicha gara itagirot magatirot. Onti iragagaran-take intagakenerira Tasorintsi kameti ineakeroniri irishineventakemparora.

¹⁰Ogari aityokyarira onae inti shintaigakemparone Aaron intiri itomiegi, magatirodari pamakeneririra Tasorintsi irirottyo shintakemparone.

¹¹“Kantankicha garatyo pamumatiniri Tasorintsi konogankicharira opoegantarira intirika pitsi, teranika onkametite pintagenerira Tasorintsi konogankicharira opoegantarira intiri pitsi. ¹²Kantankicha antari ontirika pineake ontimanakera pivankire okyaenkarira timanankitsi impo pinkogake pamagarantakenerira Tasorintsi ario pinkante kametitakettyo pamakenerira konogankicharira opoegantarira intiri pitsi, kantankicha gara itagirot saserorote itagantaganiriraku piratsi.

¹³“Magatirot pameneririra Tasorintsi omirinkatyo povochatakero tivi, irorotari suretagaigaempirone inkantakanira intsatagasanotakero Tasorintsi magatirot ikantaigakempirira.

¹⁴“Antari irororika pamakeneri turigo okyaenkarira timanankitsi onti pintashitakotakero magatirot oshikoki impo pintonogitakero okitsoki ¹⁵pisagutakerora aseite pintiakerora kasankapaneri pamanakenerira Tasorintsi. ¹⁶Impo yogari saserorote iragagarantake intagakenerira.”

Ikantaigakerira tyara inkantaigakempa vetsikaigankitsinerira terira onkametite

4 ¹Impo yogari Tasorintsi ikantakeri aikiro Moiseshi:

²“Pinkantaigakerira iseraereegi tyara inkantaigakempa kañovageigankichanerira kogapage, intimaigaketari onti inkaño-geigakempa kogapage gara yogoti onti yovetsikanake terira onkametite.

³“Irirorika kañovagetankichane itinkamisanorira saseroroteegi inkañoigakemparira itovaire inti iramanakeneri Tasorintsi ityomiani toro pairorira inkametitasanotake itagakennera kameti ganiri ikisavitiri ikañovagetakara. ⁴Onti iramakeri tsompogi sotsimoroku ivankoku Tasorintsi. Oketyo intsagatakeri igitoku impo irovetisakeri. ⁵Iragaatakero iriraa iramanakerora tsompogi otsatamagotakara kamisa tikakotirorira apinakitene. ⁶Impo iokaachapakitakempa irisagugite-takerora savi kamisaku, irimatutaemparo aikiro kigonkero aganakempara 7. ⁷Impo irimatakero otsei otagantaganirira kasankapaneri intiritakerora. Impo iramanaero aityokyarira onae irisakerora savi onampinaku itagantaganirira piratsi nankitsirira kara tsompogi sotsimoroku. *Impo iragakero magatiro igeimankure ontiri pitetiro isonkipegoki itagakerora anta.* ¹¹⁻¹²Ogari imeshina ontiri magatiro ivatsa iramanakero parikoti okaragetakera pankotsi okapinitaganira osamampote itagantaganirira piratsi. Karari kara oasankagitetakera irogisashitakeri tsitsi itagakerira irimatakero igitu, ivori, iramporetsa, itiga, magatiro.”

Impo ikantakeri aikiro ario inkañoigakempa maika tyanirika vetsikankitsine terira onkametite. Irirorika koveenkari intirika itinkamiengi intirika pashini tyanirika iramakenneri Tasorintsi piratsi itagakenneri ganiri ikisavitiri ikañovagetakara. Inti iramakenneri toro intirika kavera intirika ovisha.

6 ¹Impogini yogari Tasorintsi iniairi aikiro Moiseshi ikantiri:

²“Aityo pashini terira onkametite terira nonkogero naro. Tera nonkoge pagagarantutakerira pitovaire tatarika oita ipagetanakempi pineagetaenerira iatanakera parikoti. Antari iripokaera magatirotyo pimpaeri. Aikiro tera nonkoge pinkoshiigera ontirika pintsoe-ventaigakemparira pitovaire pineakera pagagarantutakerira tatarika oita yashintaka. Tatarika oita pagagarantutakeririra pitovaire garatyo pitsoega pinkantakera: ‘Arisanotyoko nokantake teratyoko nagagarantumatero, ineakenatari Tasorintsi tera nontsoegempa.’

³Antari tatarika impegake pitovaire impo virorika neaerone gara pashintaro, aikiro gara pikanti: ‘Arisanotyoko nokantake tera noneero, ineakenatari Tasorintsi tera nontsoegempa.’

⁴Tyanirika kañotakerone maika irogipigaerotyoko tatarika yagutakeri itovaire. ⁵Irogipigaerotyoko magatiro impaerira shintarorira kantankicha choeni irogavisumatakero impakerira pashini 1/5. Onti irogipigantaemparo kutagiteri iramantakemparira ipira itagakagantakenarira ganiri nokisavitiri yovetsikakerira. ⁶Impo iramakena paniro ovisha surari pairorira inkametitasanotake pineakerira viro antaritasanotake kametitake iramakenarira. ⁷Impo impakeri saserorote kameti irovetisakenarira ganiri nokisavitiri yovetsikakerira onti nomagisantaero.”

**Narave intiri Avio
yovetsikaigakera terira onkametite**

10 ¹⁻²Impogini yogari Narave intiri Avio yagaigake paniropage opiatantaganirira kasankapaneri otaganirira, impo ipiaigake tsitsimenki yamaiganakerora ivankoku Tasorintsi itagaigavetakennerira kasankapaneri, kantankicha katsiketio oponiaka tsitsi Tasorintsiku otagaigakeri ovashi ikamaigake kara

ivankoku Tasorintsi, ontitari yovetsikagake ikantavitantirira Tasorintsi. ³Impo yogari Moiseshi ikantiri Aaron:

—Irorotari ikantakerira Tasorintsi ikantakera:

‘Nanti Tasorintsisanorira tera nonkañovagetumatempa.

Tera tyani gaveatsine iraiñonitumatenara kogapage

nerotyo tyanirika pokankitsine naroku intsatagasanotakero nokantakerira.

Antari garika onti nonkisashitakem-pari

kameti impinkatsaigakenaniri maganiro iseraereegi.’

Yogari Aaron ikemisantaketyo. ⁴Impo yogari Moiseshi ikaemaigakeri Misaere intiri Eresapan itomiegi Osueri iriri Aaron^b ikantaigiri:

—Piaige ivankoku Tasorintsi pinoshi-kaiguterira pitomiegi pamaiganakerira parikoti okaragetakera pankotsipage.

⁵Iriroegi itsatagaigakero ikantaigakeririra Moiseshi iaigake inoshikaiganakerira, isatyoniro yogaguigarora yogagutarira saserorote yamaiganakerira parikoti okaragetakera pankotsipage. ⁶Impogini yogari Moiseshi ikantiri Aaron intiri itomiegi paitacharira Ereasare intiri Itamare ikanti:

—Gara pikañoigari kamakoigatsirira ikenkisureakoigarira kamankitsirira tera inkishiigaempa, aikiro itisaraigaanakero imanchaki. Antari pinkañoigakemparika viroegi maika onti pinkamaigake, aikiro onti inkisaigakeri Tasorintsi maganiro iseraereegi. Kantankicha iriroegi kameti-taketyo inkenkisureaigakempara ineaigakerotari yovetsikakerira Tasorintsi. ⁷Aikiro kantanani pinaigakera aka ivankoku Tasorintsi. Gara pikontetu-maigi sotsi ganiri pikamaigi, nosaguta-

kempitari aseite kameti pantavageigakeririra Tasorintsi ivankoku.

Impo iriroegi itsatagaigakero ikantai-gakeririra.

Ikantavitantagetakerira Tasorintsi irogakenkanira

11 ¹Impogini yogari Tasorintsi iniari Moiseshi intiri Aaron ikantiri:

²“Pinkantaigakerira iseraereegi:

Intagani pogaigakempa kamarigetatsirira ³tseregotsirira ishata kantanakani yamonkotiro iseka kantanakani isekachaitara yatsikasanotakerora.

⁴Yogari sekachaitacharira kantankicha tera ontseregote ishata garatyo pogumaigari, kañorira kameyo, pine irirori ikantakanityo isekachaiveta, kantankicha tera ontseregote ishata.

⁵⁻⁶Ario ikañoigaka aikiro tejon intiri tsironi, nerotyo garatyo pogumaigari.

⁷“Yogari chanco otseregovetakatyo ishata, kantankicha tera inkantakani isekachaitempa iratsikasanotakerora iseka, nerotyo garatyo pogumaigari irirori.

⁸“Garatyo pogumaigaro ivatsa maganiro kañopagerira yoka, aikiro gara pitsagatumaigiri igamaga, ikantaviigakempiritari Tasorintsi.

⁹“Yogari timaagetatsirira oaaku intagani pogaigakempa timagetatsirira ishikonke ontiri iventak. ¹⁰Kantankicha maganiro terira ontime ishikonke ontiri iventak ¹¹garatyo pogumaigari, aikiro garatyo pitsagatumaigiri igamaga. ¹²Maganiro oaakunirira terira ontime ishikonke ontiri iventak garatyo pogumaigari.”

Impo yogari aragetatsirira ikantaviigakeririra intiegi yoka: pakitsapage, tisoni, matsipanko, tontokotipage, vuvuro, tsotari, soeroni, samponero, yavuro, chomparipage intiri pijiri.

b 10.4 Iriri Aaron: yogari Osueri inti irirenti Amerame tomintasanotaririra Aaron.

Impo ikantake aikiro gara yogagari shikiri, sani intiri pashinipage takitsipage terira irimitae. Ikantaviigakeri aikiro irogaigakemparira sagari, tonoantopage, tontori, saniri, sagoro ontiri pashiro. Ikantaketari irirori:

⁴⁵“Nantitari Tasorintsi gaigaatimpirira Ejipitoku kameti pinkematsaigakenaniri. Gara pikañovagetumaigaa, teranika nonkañovagetumatempa naro.”

Ikantaigakerira tyara onkantakempa tsinane mechotakotankitsinerira

12 ¹Impogini yogari Tasorintsi iniairi aikiro Moiseshi ikantiri:

²“Pinaigakerira iseraeegi pinkantaigakerira: Ogari tsinane intimakerika otyomiani impo omechotae irirorika surari onti omanonkantake 7 kutagiteri onkañotakemparo opirinitira. ³Impo aganakempara kutagiteri 8 ogaratsaitakenkani ichonkirimeshinate otomi. ⁴Kantankicha irorori kantaka onkañotakempara maika omanonkantakera kigonkero aganakempa pashini 33 kutagiteri. Garatyo otsagatuma-tiro tatarika oita yashintaka Tasorintsi, aikiro garatyo oatumati ivankoku kigonkero aganaempara kutagiteri ganigera omanonkantai. ⁵Antari irororika omechotake tsinane onti omanonkantake 14 kutagiteri onkañotakemparo opirinitira. Impo kantakani omanonkantakera kigonkero aganaempara pashini 66 kutagiteri.

⁶“Impogini aganakempara kutagiteri ganigera omanonkantai oatake ivankoku Tasorintsi amanakera ityomiani ovisha shiriagakotankicharira patiro shiriagarini ompakerira saserorote intagakenerira Tasorintsi. Aikiro amanake paniri emori aikiro paniri shiromega ompakerira saserorote ⁷intagakenerira Tasorintsi ganiri ikisavitiro okañovagetara, aikiro kameti

ineaeroniri saankasanotai tenige omanonkantae.

“Ario onkañoiagakempa maika maganiri tsinaneege tomintaigankichanerira ontirika oshintoigakempa. ⁸Antari garika itimi ovisha amakerira amaketyo piteni emori intirika piteni shiromega, paniri intagakeneri saserorote Tasorintsi ganiri ikisavitiro okañovagetara, yogari irapitene onti intagakeneri kameti ineaeroniri saankasanotai tenige omanonkantae. Antari inkañotakerorika maika mataka saankasanotai.”

Ikantaigakerira tyara inkantakempa vesegasevetankicharira irisaankaera

14 ¹Impo yogari Tasorintsi iniairi Moiseshi ikanti:

²⁻³“Maika nonkamantakempi tyara inkantakempa vesegasevetankicharira irisaankaera. Oketyo iripokake irinapaake okaragetakera pankotsipage impo yogari saserorote iriatake ineaanotakerira arisanorika yovegasanotaa. Impo ineakerika arisano yovegasanotaa ⁴iragagakantake piteni tsimeri intirika shiromega intirika pashini ikantakerira Tasorintsi kametitake irogakenkanira, kantankicha onti iravetakakenkani gara yogamagagani. Iragagakantake aikiro inchakota santari ontiri ogamporetsani ovirio kiraatsari ontiri aikiro isopo. ⁵Impo inkantake irogamagakenkanira paniri tsimeri yamunkanirira. Onti irogamagakenkani enoku kovitiku kipatsinaki oyagiatantakemparira nia iragaatagantakerira shintsitari niateni saanari kameti oyagiatanakempara iriraa onkonoatanakemparora. ⁶Impo iragakeri irapitene terira inkame iroyagakerira kovitiku intiritantakemparira iriraa intentagantakemparora inchakota ontiri kiraatsari ovirio ontiri aikiro isopo. ⁷Impo irisagutakeri yoga vesegasevetankicharira

tovaiti irisagutakeri kigonkero aganakempara 7, ovashi inkantakeri: ‘Maika mataka saankaivi, ganige pikitsitinkantai.’ Impo irapakuaeri tsimeri iriataera.

⁸“Impo yogari vesegasevetankicharira inkivatsaratakempa, aikiro irogaragitotakempa. Inkaatake aikiro irisaankasano-taera. Impo iripokae inaigakera itovaire, kantankicha gatata ikiai igamisapanko-teku onti irimagake sotsi 7 kutagiteri.

⁹Impo impieitasanotakempa irimatakero ishpatona irorori ontiri itoshokikutirira ontiri aikiro magatiro iviti. Impo inkivatsaratakempa aikiro, aikiro inkaatake ovashi irisaankasano-tae.

¹⁰Impo onkutagitetanakera iragake piteni ovisha surari kametitasanotanki-tsirira ontiri paniro tsinane shiriagakota-nankicharira patiro. Ario onkañotake irorori onkametitasanotaketyo kara. Iragake aikiro 15 tasa turigopane

shipetyapanetasanotankitsirira onkonogantakempa aseite ontiri aikiro piteti tasa aseite. ¹¹Iragagetanakero magatiro iramanakerora ivankoku Tasorintsi.

Impo yogari saserorote kantaerineririra: ‘Mataka saankaivi’, irogaratinkakeri sotsimoroku intentagantagetakemparira yamagetakerira. ¹²Impo iragake paniro ovisha impakerira Tasorintsi. Onti irogaenokakeri enoku iroakerira ton ton ton intentagantakemparira aseite.

¹³Impo iramanakeri irovetisakenkanira anta yovetisapinitaganira piratsi itagaganira ipunkanirira Tasorintsi. Impo irogakempari saserorote inkañotagakem-parira yamaganirira yovetisaganira ganiri ikisavitantiro Tasorintsi kañova-getagantsi, intitari shintari Tasorintsi.

¹⁴“Impo iragaatakero iriraa intiritake-rira vesegasevetankicharira otsarankaku igempita irakosanorirakutirira. Irimata-kero aikiro omarane ichapaki irakosanori-rakutirira ontiri aikiro omarane ichapaki

igiti irakosanorirakutirira. ¹⁵Impo yogari saserorote iragakero aseite irisakero isarantapakoku irampate. ¹⁶Impo iokaachapakitantakempari ichapaki irakosanorirakutirira irisagugitetakerora kara ivankoku Tasorintsi tovaiti irisagugitetakero kigonkero aganakempa 7.

¹⁷Impo ogari aseite aityokyarira onae irakoku intiritantakempari vesegasevetan-kicharira kañotaka itiritantakarira iriraa. Onti intiritakeri otsarankaku igempita irakosanorirakutirira impo irimatakero aikiro omarane ichapaki irakosanoriraku-tirira ontiri aikiro omarane ichapaki igiti irakosanorirakutirira. ¹⁸Impo ogari aseite aityokyarira onae irakoku ariokya irisagutakeri igitoku ganiri ikisavitiri Tasorintsi ikañovagetara.

¹⁹“Impo iragakero ovisha tsinane irovetisakenerira Tasorintsi ganiri ikisavitiri ikañovagetara onti ineakeri saankasano-tai tenige inkitsitinkantae. Impo irovetisakeri aikiro irapitene surari intagakenerira Tasorintsi. ²⁰Impo intagakeri intentagantakemparora turigopane yamakerira vesegasevetanki-charira impakerira Tasorintsi. Ario inkañotakero maika saserorote ganiri ikisashitari Tasorintsi vesegasevetanki-charira onti ineakeri saankasano-tai tenige inkitsitinkantae, ovashi irisaankasano-tae.

²¹“Antari garika itimi irovishate iramakerira mavani, intaganityo paniro iramake surari impakerira Tasorintsi. Impo yogari saserorote irogaenokakeri iroakerira ton ton ton ganiri ikisavitiri Tasorintsi ikañovagetara. Iramake aikiro 5 tasa turigopane shipetyapanetasano-tankitsirira impakerira Tasorintsi ontiri aikiro piteti tasa aseite. ²²Impo iramake aikiro piteni emori intirika piteni shiromega, impatyo irirori. Paniro impakerira Tasorintsi ganiri ikisavitiri ikañovagetara. Yogari irapitene onti intagakantakeneri.”

**Ikantaigakerira tyara inkantakempa
saserorote inkiakera tsompogi ivankoku
Tasorintsi apinakiteneku**

16 ¹Impogini ikamaigakera piteniro itomiegi Aaron kiaigavetankicharira inakera Tasorintsi yogari Tasorintsi iniairi Moiseshi ²ikantiri:

“Pinkantakerira pirenti Aaron gara omirinka ikiapiniti tsompogi novankoku aikyara otsatamagotakara kamisa tikakotirorira apinakitene, ariotari nonakeri naro kara menkoriku otapoku kajonaki inaikakera kerovine. Gara ikiashitaro kogapage ganiri ikami. ³Antari inkiera oketyo irovetisanakena ityomiani toro ganiri nokisavitiri ikañovagetara, aikiro intagakena paniro karenero. ¹²Impo iraganake opiatantaganirira kasankapaneri otagaganira iroyaganakera tsitsimenki nankitsirira itagantaganiriraku piratsi. Impo iravivatanake aikiro kasankapaneri shipetyapaneri iramanakerora aikyara otsatamagotakara kamisa ¹³intagakenarora ontinkamitanakera ampamankanakerora otapo kajonaki inaikakera kerovine ganiri ikami. ¹⁴Impo iragakotakitero iriraa ityomiani toro iokaachapakitakempa ichapaki irisagugitetakerora otapoku kajonaki inaikakera kerovine. Oketyo irisagugitetakero onampinaku oatakara ikontetira poreatsiri impo irimatakero onegitira. Tovai irisagugitetakero kigonkero aganakempa 7.

³⁴“Kantakani inkañotakempara maika omirinka shiriagarini patiro inkiakera iramanakenara iriraa piratsi ganiri nokisaviigiri maganiro iseraeeregi ikañovagegara.”

Yogari Moiseshi itsatagakero magatiro ikantakeririra Tasorintsi.

**Ikantaigakerira Tasorintsi gara
yovetisumaigi ipira parikoti**

17 ¹Impogini yogari Tasorintsi iniairi Moiseshi ikantiri:

²“Pinkantakerira Aaron intiri itomiegi intiri aikiro maganiro iseraeeregi pinkante: ‘Ikantake Tasorintsi: ³⁻⁴Tyanirika kogankitsine irovetisakera itorone intirika irovishate intirika igaverate iramakeri sotsimoroku novankoku irovetisakenarira. Gara yovetishiri parikoti. Antari irovetisakeririka parikoti nonkisashitakemparityo nonkisavitakerira yogantakera ovashi ganigetyo nokañotagaari nashintarira. ⁵Onti nokogake inkañoigakempara maika maganiro ganigeniri yovetisaigai parikoti onti iramapiniigakeneri saserorote sotsimoroku novankoku kameti ⁶intagakenarira igeimankure noshinetakempara, aikiro iragaatakerora iriraa irisagutantakemparora itagantaganirira piratsi nankitsirira sotsimoroku novankoku.

⁷Ganigetyo yovetisumaigainiri kamaganinipage, ontitari yovetsikaigake ovegaga ikañoigakarora tsinane terira ompanirotari ojime, teranika impaniroigena naro. Ario inkañoigakempa maika maganiro iseraeeregi kigonkero iyashikivageiganakera, nantitari kantankitsi.”

Gara ogakotumatagani iraatsi

¹⁰Impo ikanti aikiro:

“Garatyo ogakotumatagani iraatsi.

Tyanirika gakotakemparone nonkisashitakemparityo ganigetyo nokañotagaari nashintarira. Viroegirika gakoigakemparone nonkisaviigakempirotyo. Irirorika gakoigakemparone pashinigitikunirira konoiigakempinerira nonkisaviigakerityo iriroegi aikiro, ¹¹irorotari aniantagani iraatsi, aikiro irorotari nokantaigakempi osakenkanira itagantaganiriraku piratsi ganiri nokisaviigimpipo pikañovageigara,

irorotari saankagetiro magatiro terira onkametite. ¹²Irorotari nokantantaigakempirira garatyo tyani gakotumataro iraatsi. Gara pogakotumaigaro viroegi, aikiro garatyo yogakotumaigaro pashini- getikunirira konoiigakempinerira.”

Ikantavitantagetirira Tasorintsi

18 ¹Impogini yogari Tasorintsi iniari Moiseshi ikantiri:

²“Pinkantaigakerira maganiro iseraereegi pinkante:

“Nanti Pitinkami Tasorintsi, narotari shintasanoigimpi.

³“Maika nonkantaigakempi gara povetsi- kagisevageigi terira onkametite pinkañoi- gakempirira Ejipitokunirira pikonoiguta- rira. Ario onkañotakempa aikiro nontentai- ganakempira Kanaanu, garatyo pikañoi- gari timaigatsirira anta pogiatakoigakerira yogameigarira iriroegi. ⁴Panirotyo naro pinkematsatasanoigake pintsatagasanoiga- kerora nokantaigakempirira, narotari Pitinkami Tasorintsi shintasanoigimpirira. ⁵Yogari tsatagasanogetakeronerira nokantakerira nonkavintsaavagetakeri intimagantsivagetake kameti.

⁶“Gara tyani parantumataro iitane, nokantaviigakempirotari naro, nantitari Tasorintsi.

²⁰“Aikiro garatyo tyani neakotumatiri itsinanetsite itovaire, teranika onkame- tite onti paio okitsitinkanti.

²²“Garatyo tyani gumatiri irapisurari- tene inkañotagakempirira tsinane, teranika onkametitumate onti ovegaga.

19 ¹⁴“Gara pikisashitumatiri terira inkeme, onti pintsarogakaga- kempari. Ario inkañotake terira inee gara pontivatiri. Onti pimpinkaigakena, nantitari Tasorintsi.

¹⁵“Yogari joesepage negintekyatyo inkanomaantavageigake. Tyanirika kañotankicha iriro inkisakagantaigake. Gara inti itsarogakagaiga shintavageiga-

charira, irirokya inkisake terira irashin- tavagetempa.

¹⁶“Gara piniashiigari pitovaire.

“Gara pitsoeventumaigari pashini kameti inkisakagantakenkanira, nokantaviigakempirotari naro, nantitari Tasorintsi.

¹⁷“Gara pikisashitari pitovaire.

“Antari pineakeririka irovetsikakera terira onkametite pinkanomaakerityo kameti ganiri pitentagari kañomataka vironirikatyo vetsikakero.

¹⁸“Tyarika inkantakempi pitovaire garatyo pikenkiakota onti pimagisanta- kotakeri pintsarogakagavagetakempa- rira pinkañotagasanotakempatyo pitsarogakagara vikiiro, narotari kantankitsi, nantitari Tasorintsi.

²⁶“Gara pogakotumaigaro iraatsi. Gara pishineventumaigaro tatarika oita pogotantaigakemparora tyarika onkantakempa impogini.

³¹“Garatyo piatumaigi inagira niaigiri- rira kamatsirini inkamantaigakempira tyara onkantanakempa impogini. Ario ikañoi- gaka seripigariegi garatyo pikamo- sotumaigari paventaigakempirira, pairotari okitsitinkanti yogameigarira iriroegi. Narotari kantankitsi, nantitari Pitinkami Tasorintsi shintasanoigimpirira.

³²“Gara pisamatsatumaigari atakerira yagatavagetanaa, ontityo pimpinkatsai- gakeri. Ario nokañotaka naro pimpinka- tsai- gakenaty, nantitari Pitinkami, aikiro nanti Tasorintsisanorira. ³³Antari inkonoigakempirika pashini terira iriro pitovaire gara pikisaigiri pantsipereaka- gaigakerira. ³⁴Ontityo pintaigakempari pinkañotagaigakempirira irironirikatyo pitovaire, pintsarogakagaigakemparityo pitsaroga- kagara vikiiro pisureigaemparora pikonoigutarira Ejipitokunirira, narotari kantankitsi, nantitari Tasorintsi shintasanoigimpirira.

³⁵“Omirinka katinka pogageigakero magatiro, irororika pogoigake kipatsi, ontirika pimpesavageigake tatarika oita, ontirika tatarika oita pogoigake pashini, garatyo pamatawantumaigi. ³⁶Tatarika oita pogotantaigakempa gara pikantati-gumaigiro irororika otenatantaganirira ontirika metero ontirika pashini tatarika oita ogotantagetaganirira. Omirinka katinka pogaigakero pogotantaigakemparora, narotari kantaigakempi, nantitari Tasorintsi shintasanoigimpirira, narotari gaigaatimpi Ejipitoku.

³⁷“Omirinka pinkematsatasanoigakena pintsatagasanoigakerora magatiro nokantaigakempirira, nantitari Tasorintsi.”

Ikantaigakerira irogaigakenkanira tyanirika vetsikakerone ovegaga

20 ¹Impogini yogari Tasorintsi iniairi Moiseshi ikantiri:

²“Pinkantaigakerira iseraereegi pinkante: “Tyanirika intagakenerira Moroko itomi irogakenkanityo, irirorika iseraere intirika timanampiaigimpirira, ontityo impitankaigakeri itovaireegi iseraereegi.

⁶“Nonkisashitakemparityo tyanirika atankitsine inaigira niaigiririra kamatsirini inkamantaigakerira tyara onkantanakempa impogini, ontitari yovetsikake ovegaga ikañotakarora tsinane terira ompaniroteri ojime, teranika impanirotena naro. Ario nonkañotagaigakempari aikiro ventaigakemparineririra seripigari, nonkisashiiigakemparityo ganige nokañotagaigaari nashintaigarira.

⁹“Tyanirika kisashitakemparine iriri ontirika iriniro irogakenkanityo, ikisashitakaritari tomintakaririra, ikiirotyo kañotagantankicha.

¹⁰“Tyanirika neakotakerine itsinane-tsite itovaire irogakenkanityo intentagantakenkanira tsinane.

¹¹“Tyanirika neakotakerine iriri irogakenkanityo intentagantakenkanira

tsinane, ikiirotyo kañotagantaigankichane, isamatsatutakeritari itsinanetsite tomintaririra.

¹²“Tyanirika neakotakerine itomi arioty inkañotagakenkani irirori aikiro irogakenkanityo intentagantakenkanira iranro, ikiirotyo kañotagantaigankichane, yovetsikaigaketari ovegaga.

¹³“Tyanirika gakerine irapisuraritene inkañotagakemparira tsinane irogaigakenkanityo piteniro, ikiirotyo kañotagantaigankichane, yovetsikaigaketari ovegaga.

¹⁴“Tyanirika gankitsine tsinane intentagantakemparora iniro ontityo yovetsikake ovegaga. Intagaigakenkanityo mavaniro ganiri otimi ovegaga viroegiku.

¹⁵“Tyanirika magempitakerine kamarigetatsirira inkañotagakemparira tsinane irogakenkanityo intentagantakenkanira imagempitakerira.

¹⁶“Ario onkañotakempa tsinane irorori omagempitakeririka kamarigetatsirira ogakenkanityo ontentagantakenkanira omagempitakerira, irorotyokañotagantankichane.

¹⁷“Tyanirika parantakemparone iritsiro iragakerora onti yovetsikake ovegaga. Irororika iragake irishinto iriri ontirika oshintoto iriniro irogaigakenkanityo piteniro, ikiirotyo kañotagantaigankichane. Antari irogaigakenkanira ineakoigakerityo maganiroro.”

Aseite ogimorekaatakenkanirira gimorekaatantachariraku

24 ¹Impogini yogari Tasorintsi iniairi aikiro Moiseshi ikantiri:

²“Pinkantaigakerira iseraereegi iramaigakera aseite orivo kameti onkantakaniniri omorekaatake gimorekaatantachariraku. Kantankicha onti iramaigake saanaatasanotankitsirira onti gotankichane orivo otinkagitunkanirira. ³Onti ogimorekaatakenkani

otsatamagotakara kamisa tikakotirorira apinakitene nokantavitantakerira onkienkanira. Omirinka onchapinienk-tanaera yogari Aaron irogimorekaero. Antari tsitekyamani irogitsivakaero inegintegetaerora impiaataera pashini. ⁴Kantakani onkañotakenkanira maika kigonkero piyashikivageiganakera, nantitari kantankitsi. Kantakani ogimorekaatenkanira novankoku. Onti ogimorekaatanenkanani gimorekaatanta-chariraku yovetsikantunkanirira kori.

Ikantaigakerira ovetsikakenkanira pan ogakenkanira ivankoku

⁵“Aikiro agakenkanira turigopane shipetyapanetasanotankitsirira ovetsika-kenkanira 12 pan. Patiropage onti onkatinkagetakero 10 tasa. ⁶Impo ogakenkani novankoku ovevirikaakenka-nira mesaku ovetsikantunkanirira kori. Antari ovevirikaakenkanira pipioteti ogakenkani, papiotiro onake 6, ogari apiptotene aikiro onake 6. ⁷Papiopage-tiro ogakotakenkanani enoku kasankapa-neri saankasanotankitsirira kameti ironiriri ontagakenkani noneakerora naro noshineventakemparora. ⁸Omirinka agempara kutagiteri apishigo-pireantaganirira yogari itinkamisanorira saseroroteegi inoshikaero pan ogantaga-tanankitsirira pashinikya irogavae intsatagakerora nokantanakerira maika kameti osuretaenkaniniri nokantaigake-ririra iseraeeregi. ⁹Ogari pan inoshikai-rira inti gakemparone Aaron intiri itomiegi, nantitari shintakaro. ...”

**Ikantakera Tasorintsi
inkematsatasanoigakeririka
inkavintsaaavageigakeri**

26 ³Impo ikanti Tasorintsi:
“Pinkematsaigakenarika pintsata-gasanoigakerora nokantaigakempirira
⁴nogivarigaigakempiro inkani kameti

ontimakagagetakerora pivankireegi ontimakera tovaiti pogaigakemparira sekatsi, oipage, okitsokipage, magatiro. ⁵Onkantakani ontimake pogaigakempa-rira garatyo pitsonkasekatkotumaiga pisekaegi, onti pisekatavageigakempa pintimagantsivageigake kameti, narotari kañotagetakakerone magatiro maika. ⁶Pishinevageigakempatyo kara, garatyo tatoita mintsaronaigimpí, noneaganontai-gakempitari matsontsoripage. ⁷Iripoka-shiigavetakempi pashini iromanataiga-kempira garatyo yagaveaigi, onti pogishi-gaigavaeri pimpatimaiganakerira pim-pogereagakerira. ⁸Pinaigavetakem-patyo 5 pogishigageigamatetyo 100, ontrika 100 irogishigageigamatetyo 10,000. Garatyo pitovaigaveta, kantanki-cha omirinkatyo pagaveantaige pim-pogereantaigera, ⁹nonkantakanitari nonkavin-tsaavageigakempi nogitovaigavageiga-kempira nontsatagasanotakerora magatiro nokantaigakempirira.

¹¹“Ogari novanko kantaka onakera viroegiku. Gara nokisashiigimpí novashigantaigakempira, ¹²onti nontimimoigakempi nontentavageiga-kempira. Panirosanoty naro nonkanta-kempira pinkematsaigakenara, narori nashintasanoigakempi, ¹³nantitari Pitinkami Tasorintsi gaigaatimpirira Ejipitoku ganigeniri yatsipereakagava-geigaimpí Ejipitokunirira yomperaperai-gimpira kameti pintimashiigaemparoniri kogapage pishinevageigakempira.

Ikantakera Tasorintsi garika ikematsaigiri inkisashiigakemparira

¹⁴“Kantankicha garika pikematsaigana ¹⁵pintsatagasanoigakerora nokantaiga-kempirira ¹⁶nonkisaigakempityo kara ovashi pintsarogavageiganake. Nogiva-rienkatashiigakempi mantsigarintsi pinkentavageiganakempira, aikiro pinkovaavageiganakera. Ganige

pineagantsivageigai pinkenkis sureavageiganakempaty kara ariompatyo piaiganakeri. Onti pimpankivageigake kogapage garaty pineaigi pogaigarora, irogutaigavakempirotyo kisashiigakempinerira. ¹⁷Nonkisashiigakempityo ovashi irogishigaigakempi kisashiigakempinerira impo iragaveaigakempi irashintaigakempi. Onkonogakempa onti pishigashigavageigake kogapage garaty tyani patimaigavetimp.

¹⁸“Kantankicha garika pikematsaigana pineaigavetakempara nonkañoigakempira maika, ariompatyo novashigakoigakempiri nonkisaviigakempirora povetskagisevageigakerira ³³ovashi pintivarokagisevageiganakempa iramaiganakempitari itimaigira kisashiigakempinerira. Ompairagitevagetanake pitimaigira.

³⁶“Impogini yogaegiri garira ikamaigipairottyo novashigakoigakempari nomintsarogavageiganaketyo kara magaroty inkemumai-gakera ashirivantakera tsipana irishigaiganae kañomataka ontinirikaty ipatimaiganunkani irogaigakenkanira. Tsikyata ironkaragaravageigakempa iriroegi. ³⁷...Garaty yagaveimaigi impugaiganakempirira kisashiigakemparineririra. ³⁸Ovashi inkamavioageigake kara igipatsiteku kisashiigakemparineririra impogereagikempa. ³⁹Impo yogaegiri aĩnokyarira irinageigae ariompatyo inkenkisureasanovageiganakempari isureiganakemparora yovetsikagisevageigakerira tera inkematsaigena, aikiro isureiganakemparora yovetsikagisevageigakerira yashikiiganakeririra ⁴⁰inkantaigakera: ‘Narotakaniroro nokañovageigaka novetsikagisevageigakera posante tera nonkematsaigeri Tasorintsi nontsatagaigakerora ikantaigakenarira. Ario

ikañoigaka aikiro yashikiiganakenarira tera inkematsaigeri nerotyo ikañotagantaigakenarira maika.’

⁴¹“Arioniroro nonkañoigakeri maika gatanika ikogaiginika inkematsaigakenara naro, nerotyo nonkisashiigantakemparinera nontivarokagisevageigakerira irashintaigakempirira kisashiigakemparineririra. Kantankicha antari impashiventagaiganakemparorika yovetsikaigakerira inkantaigakera: ‘Tsikyatyato nokañotakagantaigakana roegi’, ⁴²ario pinkante nosureta-naemparo nokantakeririra Jakovo intiri Isaako intiri aikiro Averan, nosuretakotanaemparo aikiro kipatsi nokashigakagaigakaririra. ⁴³Ovashigantanakenkanitari gara opankitantumataagani, nonkisaviigakeritari irovetsikaigakerira noneakera tera intsatagaigero nokantaigakeririra onti iperaiganakaro. ⁴⁴Kantankicha intimunteigavetakempaty igipatsiegiteku kisashiigakemparineririra garaty novashigantasanoigari nomagisantai-gakerira, aikiro gara nopogereasanogigiri, kameti nontsatagakerora nokantaigakeririra gara nokantatigiro, nantitari Tasorintsi shintasanoigaririra. ⁴⁵Ontityo nosuretaemparo nokantaigakeririra pairani yashikiiganakeririra nagaigaatirira Ejipitoku kameti nashintasanogakempirira. Antari nagaigaatirira nogakavageigakerityo kavako maganiro matsigenkaegi, nantitari Tasorintsi.”

⁴⁶Magatiro oka irorotari ikantagetakeririra Tasorintsi Moisesi anta otishiku Sunai kameti inkamantaigakerira maganiro iseraeeregi intsatagaigakerora.

Aityo pashini posantepage ikantagetakeririra terira ontsirinkakotenkani aka.